

Kem Mahathir umum blok bebas bersama Warisan

Malaysiakini

10 Julai 2020

Enam anggota parlimen Bersatu yang setia kepada Dr Mahathir Mohamad hari ini mengumumkan bahawa mereka akan kekal bersama Warisan sebagai blok bebas.

Mereka juga memaklumkan bahawa tidak akan bergabung dengan Pakatan Harapan yang diketuai oleh Ketua Pembangkang, Anwar Ibrahim mahupun bersama Perikatan Nasional yang diterajui oleh Perdana Menteri, Muhyiddin Yassin.

“Kami membuat keputusan untuk kekal bersama Warisan sebagai blok bebas di dalam dan di luar Parlimen. Kami tidak bergabung dengan mana-mana gabungan.

“Kami juga menentang sebarang usaha untuk menggantikan Speaker (Dewan Rakyat, Mohamad Ariff Md Yusof) dan akan meneruskan usul undi tidak percaya terhadap Muhyiddin yang menubuh kerajaan yang tidak dipilih rakyat.

“Kami masih utama perjuangan asal kami iaitu menolak kembalinya kerajaan kleptokrasi,” katan mereka dalam satu kenyataan bersama, hari ini.

‘Langkah Sheraton’ pada Februari lalu menyaksikan kerajaan PH tumbang dan susulan itu parti komponen utamanya - PKR, DAP dan Amanah - cuba menghidupkan PH Plus bersama wakil rakyat yang setia kepada Dr Mahathir dan Warisan.

Walau bagaimanapun sehingga hari ini, gabungan itu gagal menamakan calon perdana menteri mereka.

Sebelum ini, Dr Mahathir mengumumkan bahawa PH Plus bersetuju supaya Ketua Menteri Sabah, Shafie Afdal dilantik sebagai calon perdana menteri.

Namun, mesyuarat Majlis Presiden PH pada 6 Julai lalu memutuskan untuk tidak menamakan Shafie sebagai calon perdana menteri PH Plus. Mereka sebaliknya menamakan Anwar sebagai calon perdana menteri kelapan.

“Bagi pihak kami, mencalonkan Shafie sebagai perdana menteri adalah satu langkah positif yang perlu diambil.

“Ia bukan sahaja kerana kita percaya dia akan berkeupayaan untuk mendapatkan

sokongan majoriti tetapi juga satu langkah ke hadapan demi mempertingkatkan hubungan Semenanjung dan Sabah dan Sarawak,” kata mereka.

Kenyataan itu ditandatangani oleh Dr Mahathir selaku ahli parlimen Langkawi; Mukhriz Mahathir (Jerlun), Syed Saddiq Syed Abdul Rahman (Muar), Dr Maszlee Malik (Simpang Renggam), Amiruddin Hamzah (Kubang Pasu) dan Dr Shahrudin Salleh (Sri Gading).

Kecuali Shahrudin, keahlian mereka dalam Bersatu telah ditamatkan.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/533803>